









聖祖仁皇帝聖訓序

自古聖人誕受天命爲下民君師必亶聰  
明睿智之資首出乘乾以綏猷而立極凡  
其經緯萬端敷之彝訓者罔不深切著明  
炳日星而章雲漢典謨所載雅頌所陳唐  
虞三代之隆有如一轍欽惟

皇祖聖祖合天弘運文武睿哲恭儉寬裕孝敬  
誠信中和功德大成仁皇帝聖德廣運久道化  
成文治光昭武功赫濯薄海內外深山窮



谷之衆總淪浹於仁心仁政之中教思無  
窮訓詞深厚歷考熙明之運未有躋此崇  
皇隆者也肆我聖文左睿哲恭創寶帙奉  
皇考世宗憲皇帝以收一鱗之利

聖繼

聖用人行政一一仰法

前徽旣纂修

實錄成書復分類恭輯

聖訓五十卷俾



皇祖六十餘年敬

天尊

祖經國保民農田學校禮樂兵刑之盛蹟見之  
都俞吁咈閒者粲然常新釐然備具永貽  
我後嗣子孫億萬年昇平榘範蓋

皇祖性本生安道兼創守實集千古聖帝明王  
之大成是以

聖謨洋洋明徵定保宏綱鉅目有要有倫精一  
之心傳蕩平之王路胥不外乎此也予小



子昔在齠齡早荷

聖慈賜育宮庭祇聆

訓迪茲膺基緒紹聞衣德之志兢兢業業不懈  
益虔昕夕尋繹惟期懋遵

祖訓以無負

皇考善繼善述之貽謀顧金匱石室之藏中外  
無得見者爰命儒臣敬謹繕寫授之剞劂  
庶我

皇祖聖祖仁皇帝建中表正牖民覺世之言昭



垂寰宇羣工士庶咸得漸摩於  
聖訓之崇閎而率由無斁也不亦庥歟謹序

諱劉六平三月二十四日

聖德

卷三

聖德

卷四



祖訓  
乾隆六年三月二十四日

聖祖垂憲宇羣工士庶咸知漸舉德世之言昭



大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓目錄

卷一

聖孝

卷二

聖德

卷三

聖德

卷四



卷一 聖德

卷二 聖德

卷三 聖學

卷四 聖學

卷五 聖治

卷六 聖治

卷七 聖治

卷八 聖治

大清聖祖皇帝聖訓目錄



卷九

聖治

卷十

敬天

卷十一

法祖

卷十二

文教

附武科

卷十三



武功

卷十四

武功

卷十五

武功

卷十六

武功

卷十七

武功



卷十八

武功

卷十九

武功

卷二十

武功

卷二十一

恤民

卷二十二



恤民

卷二十三

任官

卷二十四

廣言路

卷二十五

嚴法紀

卷二十六

嚴法紀



卷三十七

理財

卷二十八

慎刑

卷二十九

慎刑

卷三十

重農桑

卷三十一



興禮樂

卷三十二

省方

卷三十三

治河

卷三十四

治河

卷三十五

治河

附運河北河水利



卷三十六

澄敘

卷三十七

賞賚

卷三十八

蠲賑

卷三十九

蠲賑

卷四十



蠲賑

卷四十一

蠲賑

卷四十二

積貯

卷四十三

飭臣工

卷四十四

飭臣工



卷四十五

飭臣工

卷四十六

飭臣工

卷四十七

訓將士

卷四十八

訓將士

卷四十九



訓將士  
附恤兵

卷五十

褒忠節

卷五十一

卹舊勞

卷五十二

廣幅員

卷五十三

弘制度



卷五十四

弭盜

卷五十五

牧政

卷五十六

禮前代

卷五十七

柔遠人

卷五十八



柔遠人

卷五十九

柔遠人

卷六十

柔遠人

大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓目錄



大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之一

聖孝

康熙元年壬寅八月庚午

上諭禮部朕惟君國之道必崇夫孝理化民之  
務首重乎尊親欽惟我

聖祖母昭聖慈壽恭簡安懿章慶皇太后仁承  
天德順協坤儀佐

皇祖太宗文皇帝肇建丕基啓



皇考世祖章皇帝宅中定鼎朕纘荷鴻圖恭承懿訓仰惟恩德愛戴彌殷

母后皇后懋昭淑範克嗣徽音表正六宮母儀四海

母后溫恭慈惠誕育藐躬聖善之德竝隆尊顯之儀宜備粵稽古制詢於僉謀恭上

聖祖母皇太后徽號曰

昭聖慈壽恭簡安懿章慶敦惠太皇太后

母后皇后徽號曰



仁憲皇太后

母后徽號曰

慈和皇太后爾部卽擇吉以聞

康熙四年乙巳九月己酉以

大婚禮成加上

太皇太后

皇太后徽號

詔諭天下曰朕惟帝王撫有四海必首隆孝治  
以端教化之源是以子孫相承而慶流奕葉



也欽惟我

聖祖母昭聖慈壽恭簡安懿章慶敦惠太皇太后佐

皇祖太宗文皇帝肇興大業啓

皇考世祖章皇帝式廓洪圖

聖母仁憲皇太后克嗣徽音母儀茂著朕纘膺  
丕緒夙夜兢兢仰荷慈幃竝弘訓育茲者遴  
選賢淑作配朕躬屬當嘉禮之成宜進尊稱  
之典謹告



天地

宗廟

社稷於康熙四年九月二十五日率諸王貝勒

文武羣臣恭奉冊寶加上

聖祖母昭聖慈壽恭簡安懿章慶敦惠溫莊太皇太后徽號曰

昭聖慈壽恭簡安懿章慶敦惠溫莊太皇太后聖母仁憲皇太后徽號曰

仁憲恪順皇太后崇兩宮之顯號洽萬國之懽



心祉貽孫子宏昭式穀之源禮備尊親大錫  
覃恩之典

康熙六年丁未十一月戊午

詔諭天下曰朕惟自古帝王建極綏猷保民圖  
治莫不以懋昭先德祇盡孝忱爲務朕纘承  
丕基躬親庶政恭惟

世祖章皇帝功德兼隆當崇配享暨

聖祖母太皇太后

聖母皇太后恩勤備至宜盡顯揚是用上稽前



典下協輿情謹告

天地

宗廟

社稷率諸王貝勒文武羣臣於康熙六年十一

月朔有七日冬至恭祀

上帝十六日如夏至儀恭祀

皇地祇竝奉

世祖章皇帝配享十七日恭奉冊寶加上

聖祖母昭聖慈壽恭簡安懿章慶敦惠溫莊太



皇太后徽號曰

昭聖慈壽恭簡安懿章慶敦惠溫莊康和太皇  
太后加上

聖母仁憲恪順皇太后徽號曰

仁憲恪順誠惠皇太后慶禮兼行鴻恩廣逮率  
由舊章覲揚前列之高厚永膺純嘏覃敷怙  
冒之恩慈彰孝道於千秋孚德心於六合布  
告天下咸使聞知

康熙九年庚戌閏二月庚戌



上諭禮部

慈和皇太后誕育朕躬未遂孝養思慕之忱每切於懷雖已上

尊諡今應升祔

太廟配享

皇考典禮關係重大其應進

諡號著議政王貝勒大臣九卿科道會同詳議以聞

丁巳



上諭禮部

皇考升遐倏歷十載罔極之思時恫於懷  
山陵在望未一展祭尤切悽愴朕擬於今歲八  
月恭行謁

陵禮又奉

太皇太后旨思念情殷亦欲詣

陵朕敬遵

慈命躬侍以行應行典禮爾部詳議以聞

五月丙辰朔



慈和皇太后升祔

太廟禮成

詔諭天下曰朕惟自古帝王以孝治天下莫不  
顯揚母德追崇配享以爲紹先啓後之本朕  
纘承丕緒九載於茲恭惟我

皇妣孝康慈和莊懿恭惠崇天育聖皇后光贊  
皇考成締造之豐功誕育藐躬啓昌隆之景運  
徽音遠播厚德弘施

廟祀未崇朕懷罔極是用上稽前典下協輿情



祇告

天地

宗廟

社稷於康熙九年五月初一日率諸王貝勒文武羣臣恭奉冊寶加上

皇妣尊諡曰

孝康慈和莊懿恭惠崇天育聖章皇后升祔太廟鴻儀旣舉恩赦宜施隆侑饗於千秋廣孝思於萬國布告中外咸使聞知



九月丙辰

上諭禮部

太祖高皇帝創建鴻圖肇興景運

太宗文皇帝丕基式廓大業克弘迨

世祖章皇帝誕昭功德統一寰區卽欲躬詣

太祖

太宗山陵以天下一統致告用展孝思因盜賊

未靖師旅繁興暫停往謁朕以藐躬纘承鴻

緒上託



祖宗隆庥天下底定盜賊戢寧兵戈偃息每念  
皇考未竟之志朝夕寢食不遑寧處本欲先詣  
太祖

太宗山陵再詣

世祖山陵因奉

太皇太后慈命以

世祖升遐十年未得一詣

陵寢於本年八月前往朕是以躬侍

太皇太后先詣



孝陵展謁禮成言還今欲仰體

皇考前志躬詣

太祖

太宗山陵以告成功展朕孝思著議政王貝勒

大臣內院九卿科道掌印不掌印各官會議

具奏

康熙十年辛亥正月甲子

上諭禮部朕仰體

世祖章皇帝遺志欲躬詣



太祖

太宗山陵展祭以告成功前命議政王貝勒大臣等會議議政王等以去年各處多有水旱災荒且爲時甚迫應用之物預備不及請暫行停止今思

太祖

太宗創業垂統功德隆盛

山陵在望刻不能忘去年恭謁

孝陵禮成今已數月若再久延孝思莫殫朕懷



靡寧茲當海內昇平欲乘此恭謁

福陵

昭陵以告成功用展孝思事關大典著議政王  
貝勒大臣內閣九卿科道各官會議具奏爾  
部卽遵諭行

九月辛未

上往盛京謁

陵禮成文武各官宴賚有差召八十以上耆民

賜飲



諭侍臣等曰朕展謁

山陵惓惓在念今得至發祥重地拜謁  
陵寢用展孝思祭禮已成朕懷大慰又

諭守

陵總管副總管等曰爾等職司祀典凡一應祭  
品必親加虔視務盡誠敬副朕孝思

康熙十一年壬子正月庚午

上詣

太皇太后宮問安



太皇太后曰我因偶患微疾欲往赤城湯泉汝若同往恐悞國事可不必往

上奏曰

太皇太后駕幸湯泉臣若不隨往侍奉於心何安至國家政事已諭內閣著閒一日馳奏一次不致有悞

十二月丁巳

上諭學士傳達禮曰朕昨詣太皇太后宮問安



太皇太后諭云予雖在宮壺

太宗行政亦畧知之彼時開創甚重騎射方今天下太平四方寧謐然安不忘危閒時仍宜訓練武備至於在朝諸臣奏事豈無忠誠入告者然不肖之類假公行私附已者則爲引進忤已者卽加排擠亦或有之爲人君者務虛公裁斷一準於理則事無差失矣朕繹慈訓人君之道誠莫要於虛公裁斷之一言也

康熙十二年癸丑二月己未



上諭學士傳達禮曰爾衙門所進翻譯大學衍義一書朕恭呈

太皇太后御覽奉

慈諭云人主居四海臣民之上所關甚鉅然代天理物端在躬行致治興化必先修己此書法戒畢陳誠爲切要爾特加意是編命儒臣翻譯刊刻更令頒賜諸臣予心欣悅特發內帑白金千兩可卽賚予在事諸臣朕仰遵慈旨頒賜爾等其欽承之



五月乙亥

上諭學士傳達禮曰朕因  
太皇太后聖體少有違和不時省問昨躬奉湯  
藥幸已大愈朕心方慰頃又進滋補之劑矣

七月壬午

上諭大學士圖海等曰

太宗文皇帝實錄鉅典攸關今命卿等董率各  
官重加纂輯務期敬慎將事速竣大典以副  
朕繼述先猷顯揚



祖德之意

康熙十三年甲寅二月乙未朔

上諭講官喇沙里等曰朕從前賞賜出征官兵  
奉

太皇太后慈諭特出宮中撙節銀兩爲賞賜之  
用見在調遣禁旅啓行期迫恐伊等措辦艱  
難賞賜本無定例亦宜格外加恩今又蒙

太皇太后諭令將宮中緞匹銀兩賞給官兵此  
誠



太皇太后至德弘恩爾等職司記注故諭知之

康熙十五年丙辰正月乙未

詔諭天下曰朕惟帝王綏理萬方首崇孝治尊親之典因事加隆至建立元儲懋敦國本尤必推原懿德上晉徽稱此歷代不易之盛軌也欽惟我

聖祖母昭聖慈壽恭簡安懿章慶敦惠溫莊康和太皇太后佐

皇祖太宗文皇帝肇造丕基啓



皇考世祖章皇帝恢弘大業

聖母仁憲恪順誠惠皇太后母儀茂著克嗣徽  
音朕奉事慈闈並承訓育紹基圖治宵旰靡  
寧茲者祇遵

懿命冊立皇太子禮成仰惟垂裕之仁式舉顯  
揚之典謹告

天地

宗廟

社稷於康熙十五年正月十一日率諸王貝勒



文武羣臣恭奉冊寶加上

聖祖母昭聖慈壽恭簡安懿章慶敦惠溫莊康  
和太皇太后徽號曰

昭聖慈壽恭簡安懿章慶敦惠溫莊康和仁宣  
太皇太后

聖母仁憲恪順誠惠皇太后徽號曰

仁憲恪順誠惠純淑皇太后慶禮告成恩綸宜  
沛崇儀顯號昭令範於千秋錫類推恩洽懽  
心於四海布告中外咸使聞知



康熙二十年辛酉十二月丁酉

上諭禮部獻歲

太皇太后壽屆七袞洊臻景福諸王大臣應行  
慶賀禮儀各視官爵爲差其慶賀日期爾部  
擇吉以聞

庚子

上諭禮部朕惟戡定本啓佑之恩顯揚備尊親  
之禮成功旣告盛德宜彰所以展孝忱昭慶  
典也逆賊吳三桂背恩反叛數年以來朕仰



承

聖祖母昭聖慈壽恭簡安懿章慶敦惠溫莊康  
和仁宣太皇太后暨本朝高宗純皇帝聖訓  
聖母仁憲恪順誠惠純淑皇太后慈訓  
亂克奏救寧思上答乎弘仁應進崇夫顯號

謹加上

太皇太后徽號曰

昭聖慈壽恭簡安懿章慶敦惠溫莊康和仁宣  
弘靖太皇太后



皇太后徽號曰

仁憲恪順誠惠純淑端禧皇太后播徽音於四海介景福於萬年爾部擇吉具儀以聞

康熙二十二年癸亥四月丙子工部題

修

孝陵五空橋甬道估計工價銀兩

上曰

陵寢關係重大前監修各官草率修理因致損壞今若以節省之故估價短少錢糧不敷將



舊存磚石充用恐不堅固寧使價值寬餘務  
令永遠堅固著重修  
陵寢堂司官詳勘議奏

康熙二十四年乙丑正月癸酉

上以孟春詣

太廟致祭畢

諭內閣學士席爾達太常寺卿葛思忒等曰往  
見贊禮郎宣讀祝版至朕名聲輒不揚父前  
子名禮經所載朕對越之次惟懼誠敬稍有



未至無以昭格神靈爲子孫者通名於祖父  
豈可涉於慢易嗣後俱高聲朗誦無庸顧忌

九月乙亥先是

上駐蹕博洛和屯聞

太皇太后聖體違和星夜回鑾親奉湯藥夜半  
尚未就寢迨

太皇太后聖體康寧奉

慈諭幸白塔寺將行大雨近侍奏曰道路泥濘  
請俟少霽行



上曰近因

聖祖母偶爾違和朕心深切憂慮今已痊愈甚  
爲慶幸何憚此一往不以仰慰

慈衷乎遂冒雨行

康熙二十六年丁卯十一月壬寅

上諭刑部朕奉

太皇太后朝夕承懽祇遵

慈訓竭誠奉養今者

聖躬偶爾違豫朕夙夜滋懼寢食靡寧仰冀



上天眷顧俯垂默佑惟思好生以迓  
天庥寬大以延遐壽所有內外問刑衙門見監  
重辟人犯除十惡死罪及貪官光棍不赦外  
其餘監候死罪重犯槩行減等發落以昭朕  
天永佑至意

甲辰

上諭大學士等曰自

太皇太后聖體違和以來多方醫治病勢漸增



朕夙夜憂懼茲欲躬禱

郊壇保護

慈躬康寧大學士隨同九卿等奏曰

皇上聖孝之誠必當感格

穹蒼臣等愚見似不必詣

壇致祭

天心自爲默佑

上復諭曰自

太皇太后違和以來朕在宮中無日不竭誠默



禱今

太皇太后病勢漸增朕心益加恐懼惟有竭抒  
忱悃叩祈

上天之眷佑耳可卽將此旨傳諭諸臣

十二月乙巳朔

上率諸王貝勒貝子公等及文武官員自

乾清宮步詣

天壇致祭祝文曰臣仰承

天佑奉事祖母太皇太后高年荷庇藉得安康



今者疹患驟作一旬以內漸覺沉篤臣夙夜  
靡寧寢食捐廢虔治藥餌徧問方醫罔克奏  
效五內憂灼莫知所措竊思

天心仁愛覆幬無方矧臣藐躬夙蒙

慈養憶自弱齡早失怙恃趨承祖母膝下三十  
餘年鞠養教誨以至有成設無祖母太皇太  
后斷不能致有今日成立罔極之恩畢生難  
報值茲危殆方寸潰迷用敢潔蠲擇日呼籲  
皇穹伏懇



憫念篤誠立垂

昭鑒俾沉疴迅起遐算長延若大數或窮願減  
臣齡冀增太皇太后之壽讀祝版時

上涕淚交頤陪祀諸王貝勒貝子公等及文武  
官員無不感泣祭畢

上卽詣

慈寧宮侍疾

甲寅內閣及部院衙門官員公同具疏

請



皇上少節勞瘁

上曰朕自

太皇太后違豫以來心懷憂慮日侍左右檢方調藥親視飲饌

太皇太后寧憩之時朕惟隔幔靜俟席地危坐一聞

太皇太后聲息卽趨至榻前凡有所需手奉以進因此晝夜不能少離

太皇太后屢有



慈旨命朕回宮少宜自愛朕念幼蒙  
太皇太后撫養教訓三十餘年罔極深恩難以  
報答今見病體未痊五內焦灼莫知所措朕  
躬寢處何暇顧計當此時不竭盡心力少抒  
報答之忱異日雖欲依戀

慈闈豈易得耶

己巳子時

太皇太后崩於慈寧宮

上擗踊哀號呼天搶地哭無停聲飲食不入口



王以下文武羣臣公疏奏請節哀

上不允隨諭曰朕覽自古帝王居喪持服以二十七月易爲二十七日惟魏孝文帝欲行三年之喪朕平日讀史至此常羨慕之今非欲邁古賢君祇念朕甫八歲

世祖章皇帝卽賓天十一歲

慈和皇太后又崩逝藐茲沖齡音容未盡記憶

未獲盡孝至今抱憾仰賴

聖祖母太皇太后鞠養教誨以至成立今遽遭



大故五內潰迷回思早喪

怙恃益增痛傷哀疚靡盡今持服二十七月少  
慰罔極之痛朕獨持服宮中於政務毫無曠  
廢不令臣民持服一切俱不禁止如此可以  
遂朕本懷朕哀慟即可少止諸王大臣等奏

曰

皇上至德純孝亘古莫比但古者以日易月爲  
不易之典誠以帝王之孝與臣民不同

願



皇上仰遵

遺詔博稽古制上思

天地

祖宗付畀之重下慰羣臣百姓仰賴之忱以禮

節哀易月之典守而勿更

上諭曰朕事

太皇太后三十餘年竭盡衷誠無稍違拂近者

聖體違豫三十餘日衣不解帶必誠必敬朕之

此志期在必遂否則貴爲天子富有四海亦



奚以爲爾等其詳議之諸王大臣等聞來春  
諭皆感悚嗚咽又奏曰

皇上一身爲

郊壇

宗廟

社稷所寄托每當祭享伏見

鑾輿親蒞竭誠盡敬古者祭爲吉禮必於除服

後舉行

皇上以



太皇太后之故若使

郊

廟神靈少有弗歆卽

太皇太后在天之靈亦必不安且君臣兆姓本

屬一體若

皇上持服宮中臣民安然卽吉甚非一體之義

況

皇上奉事

太皇太后三十餘年晨昏孝養卽違豫以來晝



夜憂勤罔非孝思今乃於  
慈闈遺命反不曲遵恐有虛  
太皇太后惓惓之意臣等不揣愚賤敢以固請  
上諭曰朕意已定不必更奏  
是日

上諭禮部朕孝服用布舊制國有大喪自宗室  
公以上服素帛今孝服俱改用布宮內年幼  
皇子公主一體持服

康熙二十七年戊辰正月辛巳



上諭禮部

大行太皇太后聖德母儀昭示萬國昔奉我

皇祖太宗文皇帝贊宣內政誕育我

皇考世祖章皇帝顧復勛勞受無疆休大一統

業暨朕踐阼方在沖齡仰荷我

聖祖母訓誨恩勤以至成立晨昏依戀三十餘

年方期游享遐齡茂膺繁祉詎意適遭違豫

奄忽上賓朕哀疚之深五中摧絕昊天罔極

報德實難緬維厚澤深仁信足炳傳簡冊非



薦隆號莫展哀誠宜恪遵彝憲恭上

尊諡垂示無窮以慰朕尊親之意著內閣翰林院詹事府會同擬奏其應行典禮爾部詳議以聞

戊子

上諭九卿詹事科道等曰朕遭

太皇太后崩逝欲持服二十七月立志甚堅諸王大臣及百官士民再三陳奏情詞懇切不得已勉從所請中心歉仄因幕居乾清門外



以盡哀誠今乃又請回宮不過以朕躬爲念  
身爲天子豈不自愛但人孰無祖父母父母  
爲子孫皆當盡孝何分貴賤朕孝治天下思  
以表率臣民垂則後禩今距釋服之期爲時  
甚近若從所言以致異日稍畱遺憾恐非諸  
臣愛君之意諸王大臣激切奏懇已有諭旨  
不允卿等其仰體朕心勿復言

庚寅先是諸王大臣及士民等奏請以  
日易月之疏未奉



俞旨至是

上諭曰朕以薄祐幼失

怙恃幸依

聖祖母膝下如見

皇考妣音容今遭遇棄痛念

慈恩悲哀竝集欲持服二十七月仰答

聖祖母鞠育深仁兼報

皇考妣劬勞大德諸王大臣及各官等援引歷  
代成例堅請再三竝稱



郊

廟祀典不宜久輟升祔大禮及時舉行且士民  
伏闕披瀝衆情謂國恤淹久有妨民業朕反  
覆思維不得已以禮抑情勉從所請

戊戌

上諭大學士明珠內務府總管班第等曰自  
太皇太后違豫

皇太后盡孝侍奉甚爲勞瘁  
太皇太后賓天復哀痛太過



慈顏清減昨者朕詣

皇太后宮問安見癯瘦更甚積勞成疾服藥調理朕心深爲憂慮明日

太皇太后一月之祭爾等可奏請不必前往

三月庚子

上諭從前詣

兩宮請安皆於起居注記檔今詣

寧壽宮請安朕因不忍過

慈寧宮故從啓祥門行走但此係宮禁之地外



官無由得知後每次請安著令太監傳諭敦住仍令起居注記載其不忍由隆宗門行走之故亦令諭侍郎庫勒納知之

康熙三十八年己卯三月乙酉

上駐蹕蘇州府江南江西總督張鵬翮等率蘇州府官員士庶進表慶賀

萬壽節

上諭曰朕往歲萬壽節猶照常行禮太皇太后賓天以後遂不復受賀此日但齋戒



獨處觀書寫字而已且朕平居原不喜宴樂  
在京時諸王大臣每遇萬壽節輒請如前行  
禮朕皆不允今巡幸至此若受慶賀則非朕  
初意矣衆意諄切朕已知之不必再請

康熙四十一年壬午七月庚戌朔

上駐蹕熱河聞和碩溫憲公主薨日晡未進膳

扈從諸大臣奏曰

皇上聞公主訃過哀此時尚未進膳恐

聖躬太爲勞瘁奏入



上傳諭曰公主係已嫁之女朕尚可寬釋但

皇太后自幼撫養忽值此變

皇太后傷悼弗勝膳尚未進朕亦何心進食乎

康熙四十九年庚寅正月壬午先是

上諭禮部蟒式舞者乃滿洲筵宴大禮至隆重

懽慶之盛典向來皆諸王大臣行之今歲

皇太后七旬大慶朕亦五十有七欲親舞稱觴

是日於

皇太后宮進宴



皇太后升座樂作  
上近前起舞進爵

康熙五十六年丁酉十一月癸丑

上駐蹕湯泉

諭大學士等曰湯山至德勝門四十餘里德勝  
門至大內將及十里此間設立腰站二處各  
派部院賢能司官一員筆帖式一員如此則

朕遣人請

皇太后安竝



皇太后差人至朕處俱不致遲悞矣

十二月甲申諸皇子傳

諭曰

皇太后病勢漸增朕承懽奉養歷數十年不幸  
值此朕躬雖抱病此心未能稍釋頃親往請  
安朕體甚覺委頓

皇太后倘有不諱朕自當竭力以盡禮節耳

乙酉諸皇子傳

諭曰昨日朕足背浮腫不能轉移因



皇太后病勢大增用手帕纏足乘軟輿詣

寧壽宮朕捧

皇太后手奏云

母后臣在此

皇太后張目畏明以手障光視朕執朕手朕心

悲痛欲在

寧壽宮守視因病體萬不能支而出朕若居於  
素所寢處之地心甚不安因於蒼震門內設  
立帷幄以居衣不解帶朕數日來徧身沉重



中心煩燥不能成寐三鼓時稍寢卽醒醒時  
頭暈隨又起坐至五鼓始寢半刻朕欲竭力  
盡禮似此形勢甚恐不能支持益滋不安耳

丙戌大臣等奏

聖體違和仰祈節勞保攝奏入

上曰

皇太后倘有不虞朕當力疾盡禮爾等各  
有父母勿過爲勸阻朕益傷悼益增疾矣是日酉

刻



皇太后崩於寧壽宮

上拊膺哀號卽行割辮孝服用布哭泣弗輟諸

皇子屢次叩請始回蒼震門內

丙午諸王大臣等公奏明日

大行皇太后殯宮行大祭禮

聖躬近日方稍愈請今晚不必親詣

梓宮前哭奠

上諭曰二十一日二十二日朕本欲親詣致祭

因二十七日欲親往釋服是以未去自二十



三二十四日以後朕躬比前較愈儘可往矣  
諸皇子大臣屢次勸止倘朕今可以去而不  
去他日回想豈非遺憾乎今朕必親去將此  
諭衆知之

康熙五十七年戊戌三月壬戌諸王大  
臣合詞具奏

皇太后大事已滿百日諸禮俱畢請照禮部所  
請於十四日薙髮

上諭曰方



皇太后大事

梓宮未出之前朕立意欲曲盡乃心不幸身病不能支持難以勉強諸事未盡朕心抱恨無窮又思當此之時止有孝敬朕之人竝無愛恤朕之人尊長輩已無存者此等處每以無可與言爲傷茲距四月初七日爲日無幾著過四月初七日薙髮

康熙五十九年庚子十二月甲辰諸王貝勒貝子公滿漢文武大臣謹奏



皇上御極六十年普天大慶恭請行慶賀典禮  
上諭大學士等曰朕素性不喜行慶賀禮是以  
元旦惟照例行禮停止筵宴雖萬壽日亦久  
不行慶賀禮今王大臣等爲朕御極六十年  
奏請慶賀行禮欽惟

世祖章皇帝因朕幼年時未經出痘令保母護  
視於紫禁城外

父母膝下未得一日承懽此朕六十年來抱歉  
之處正月初七日



世祖章皇帝忌辰二月十一日

孝康章皇后忌辰朕何敢於正月初七二月十一日以前行慶賀禮此所奏不准行

庚申

上諭大學士等曰諸王大臣爲朕在位六十年奏請慶賀而於典禮之大者竝未議及朕在位六十年皆

祖宗積德陰祐所致幸而六十年來一無所失應先往盛京



三陵行大祭典禮但朕今年近七旬不能親謁  
三陵應遣皇子等恭代告祭俟上元節後朕親  
往

孝陵恭行大祭典禮爾滿漢大臣會議具奏其  
祭

陵撰文卽將朕旨纂入



大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之一



聖訓

卷一

三



大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之二

聖德一

康熙六年丁未七月己酉

上躬親大政詔諭天下曰朕以沖齡嗣登大寶  
輔政臣索尼等謹遵

皇考世祖章皇帝遺詔輔理政務殫心効力七  
年於茲今屢次奏請朕承  
太皇太后之命躬理萬幾惟



天地

祖宗付託至重海內臣庶望治方殷朕以涼德夙夜祇懼天下至大政務至繁非朕躬所能獨理宣力分猷仍惟輔政臣諸王貝勒內外文武大小各官是賴務各殫忠盡職潔已愛民任怨任勞不得辭避天下利弊必以上聞朝廷德意期於下究庶政舉民安早臻平治凡我軍民宜仰體朕心務本興行樂業安生以迓休寧之慶政在養民敢虛



天地生成之德時當親政恒念  
祖宗愛育之心布告天下咸使聞知

康熙八年己酉正月戊申

上諭工部前奉

太皇太后諭謂乾清宮交泰殿棟樑朽壞宜撤  
舊重建以爲朕宮

慈命諄復朕不敢違但陶唐茅茨不剪夏禹宮  
室是卑其母事華麗止令樸質堅固以稱  
太皇太后惓惓至意



八月辛未

上諭吏部前京察處分滿尚書侍郎等因無事  
故被革俱給還原官令其候補今思滿漢諸  
臣被革相同朕原無異視應一體施恩京察  
內有漢尚書侍郎被革者察明議奏

康熙九年庚戌二月癸未

上諭刑部向來定例流徙尚陽堡寧古塔罪人  
於六月十二月停遣餘月皆令發往今思自  
十月至正月俱嚴寒之候所徙罪人貧者殊



多衣絮單薄無以禦寒罪不至死而凍斃於路甚爲可憫繼自今流徙尚陽堡寧古塔罪人自十月至正月及六月俱勿遣

閏二月庚寅

上諭工部朕經行城外見道旁枯骸惻然可憫或因爾部修治道途以致暴露亦未可知其令有司掩埋并行各省凡齒骼悉爲收瘞

四月乙未浙江巡撫范承謨疏言仁和縣知縣丁世淳以繼母劉氏年老呈請



終養吏部議覆定例父母年七十以上者終養竝無終養繼母之例

上曰既有終養之例豈可分別生母繼母丁世淳准其終養

康熙十年辛亥三月壬子朔

上諭年幼諸王曰聞爾等恃威行事豈果有所利耶夫無益之威逞之何用爾等皆朕懿親人自敬畏至於所屬在外官員原爲國家治事理民爾等若勒索其財物彼何所取而應



奉耶宜以時嫻習騎射暇則讀書毋徒溺於  
嬉戲也

是日

上諭和碩安親王曰爾在諸王中以齒則高以  
行則長若年幼諸王率意妄爲爾其訓飭之  
四月壬午朔吏部題鑲黃旗拖沙喇哈  
番阿喇密故無子弟承襲罷世職其母  
年老無依應給半俸嗣後均照此例若  
係繼母不准給予



上曰繼母亦母也其與生母一體給之著爲令

九月辛未

上往盛京謁

陵禮成

諭戶部刑部奉天係

祖宗發祥重地奉天府寧古塔等處除十惡死  
罪不赦外凡已結正未結正死罪俱著減等  
其軍流徒杖等罪俱著寬釋自山海關至奉  
天府所屬地方康熙十年十一年分正項錢



糧俱著豁免

康熙十五年丙辰五月丁亥

上諭兵部據寧夏提督趙良棟疏報逆賊犯寧夏河東諸堡俱被脅從今聞招撫相繼投誠朕思河東各堡因地狹民稀不能敵賊一時被脅誠非得已其槩從寬宥該提督仍加意撫綏以副朕惠愛元元至意

七月己酉

上諭兵部吉安一郡逆賊盤踞日久小民被脅



蓄髮者多此不過畏死曲從耳且勞師討賊  
原以爲民若大兵所至將蓄髮者槩行誅戮  
殊非朕撫恤殘黎至意倘有據守城池山寨  
執持兵械抗拒不降者仍誅剿之其餘俱著  
免死俾得自新爾部通行曉諭各將軍一體  
遵行

康熙十七年戊午二月甲辰

上諭兵部廣東兵變時被掠男婦子女可令平  
南王尚之信總督金光祖等嚴行察出令人



民識認悉皆發還俾其父子夫妻完聚粵西  
平定之日將軍莽依圖傅弘烈等亦各察明  
被奪人口遣還原籍

閏三月丙寅

上諭戶部朕巡視京畿見八旗亡故軍士葬地  
窄狹邱墓纍纍亦有竟無塋地者皆因郭外  
近地價值騰貴故不易得本朝軍士奕世効  
力行間殞命疆場或身被重傷在家老死皆  
家業貧窮至無葬地朕每觸目甚爲憫惻作



何撥給地土俾八旗貧苦兵丁俱獲葬所令  
議政王貝勒大臣詳議以聞

四月戊子

上諭兵部吳三桂背恩倡亂伊所屬人員向沐  
國恩甚久其中不無被脅者韓大任等旣經  
投誠仍令議敘加恩其同來護軍甲兵皆國  
家素所豢養之人若輩父母妻子俱陷賊中  
可遣發令歸滇中俾得完聚其續至者爾部  
逐一問明或有願歸者奏聞併發



乙未

上諭戶部前命爾部清察地畝以給出征死亡  
兵丁葬地必平原高燥之處方可若地勢卑  
濕不堪爲墳塋雖撥給何所用之又須與道  
路相近若道路太遠則貧家難以趨赴矣至  
於官員秩卑小民貧乏者皆資地畝爲生若  
取伊等之地撥給兵丁又致伊等失業可查  
內務府所管地畝及諸王大臣地畝詳加丈  
量有溢於正額者給與兵丁以副朕優恤至



意

康熙十八年己未四月丙戌

上諭兵部湖南廣西已經底定滇黔指日蕩平  
凡在京在外大小文武官員內有家口陷於  
賊中者有子身投誠家口仍在彼地者有前  
以抗賊被害而家口尚有遺畱者大兵到日  
一一清察務加保全俾之得所聽其家屬完  
聚爾部卽通行傳諭各路大將軍將軍督撫  
提鎮等遵行



七月庚申

上諭戶部工部朕御極以來孜孜求治期於上  
合

天心下安黎庶夙夜兢惕不敢怠荒乃於本月  
二十八日巳時地忽大震皆因朕躬不德政  
治未協大小臣工弗能恪恭職業以致陰陽  
不和災異示儆深思愆咎悚息靡寧茲當力  
圖修省以迓

天庥念京城內外軍民房屋多有傾倒無力修



葺恐致失業壓傷人口五城御史不能逐戶  
細察止聽屬員開報於朕加恩軫恤之處不  
得均沾實惠著另遣滿漢御史詳加稽察其  
窮苦兵丁出征在外房屋毀壞妻子露處無  
力修葺朕心更爲憫念該部卽行令八旗都  
統副都統叅領親行詳察毋致遺漏

八月甲子

上諭內閣戶部官員兵丁房屋牆垣頃因地震  
塌毀甚多一時不能修葺四品官員以下現



食半俸此一次仍行全給其護軍撥什庫披甲當差人役錢糧著卽支與兩月令其修理

庚辰

上諭戶部通州三河等處遇地震壓死者甚爲可憫戶工二部會同將旗下及民人房屋并寺廟被壓之人速察明數目遣司官四員前往驗視動支帑銀帶往有主收殮者給予銀兩無人承認者著所遣司官同地方官設法埋瘞



十二月丙寅

上召大學士等至懋勤殿

諭曰君臣誼均一體勢分雖懸而情意不隔安危欣戚無不可相告語者堂陛之誼固宜如是也邇者朕體初平殿廷不戒被燬於火爾諸臣因朕偶恙復覩此災愛主心切必謂朕當過於憂慮朕披閱經史頗明大道朕之一身上受

祖宗之付託下繫臣民之瞻仰爲任匪輕寧不



自愛惟是今秋有地震之變又各處饑饉洊臻寇盜未息此朕早作夜思中心惶懼寢食靡寧者至於殿廷告災乃

上天致警敢不夙夜祇畏修省厥愆然其所關止屬朕躬臨御之所但得海宇清晏置斯民於衽席之上則朕今所居較諸前代茅茨土階尚或過之矣豈至以露處爲慮哉朕自五齡卽知讀書八齡踐阼統蒞萬方  
太皇太后嘗問朕何欲朕敬對曰臣無他欲惟



願天下乂安生民樂業共享太平之福而已  
當時左右實共聞之自昔迄今謹持此心兢  
兢業業恒如一日可以質諸寤寐倘有政治  
失宜皆朕躬之咎從不諉過臣下惓惓之意  
茲與爾等悉之

康熙十九年庚申八月癸未先是吳三  
桂反平南王世子尚之信從賊及歸正  
仍隱與弟之節等糾黨誘殺都統王國  
棟謀亂事覺下議政大臣等集議論罪



上諭議政王大臣等曰尚之信謀爲叛逆卿等  
集議論罪如律但平南王尚可喜航海歸誠  
効力行閒鎮守粵東著有勞績及吳逆叛亂  
堅守臣節不肯從逆爲逆子尚之信所逼憤  
恨殞命朕每念及深爲憫惻其妻舒氏胡氏  
從寬免死竝免籍沒尚之孝尚之璋尚之隆  
等俱從寬免革職枷責尚之信不忠不孝罪  
大惡極法應立斬姑念曾授親王從寬賜死  
其餘逆黨尚之節李天植等悉按律正法



康熙二十年辛酉七月甲子

上諭吏部兵部凡官員祖母母竝妻緣事者卽  
議鞭責折贖於大體不合如果事犯重大不  
妨削其封誥治罪若鞭責折贖小過或將伊  
夫或伊子孫品級俸祿議罰爾部會議定例  
具奏

八月丙申

上諭刑部商民領吳逆資本者甚多隱匿者亦  
或有之若據告追究恐無賴之徒借此詐害



富民有累百姓商民爲四民之一富民亦國家所庇藏富於民不在計此銖兩以後有首告者俱不准行

九月壬申

上諭戶部積貯爲國家大計歲運漕米充實京倉最爲緊要旗丁人等輓運勤勞宜加存恤朕頃巡行近畿至通惠河一帶見南米漕船旗丁人等資用艱難生計窘迫恐其苦累難支以致沿途遲滯貽誤倉儲所關匪細前以



軍需浩繁漕運額設錢糧節經裁減今應作何酌復著詳議以聞

十二月癸巳九卿詹事科道等以滇南蕩平請加上

尊號

上諭曰爾等以大憝旣除寰宇底定奏請上朕尊號朕思曩者平南王尚可喜奏請回籍時朕與閣臣面議圖海言斷不可遷移朕以三藩俱握兵柄深恐日久滋蔓釀成不測故決



意撤回不圖吳三桂背恩反叛八年之間外  
內騷動兵民交困賴

上天眷佑

祖宗福庇逆賊蕩平倘復再延數年百姓不幾  
疲敝耶憶爾時惟有莫洛米思翰明珠蘇拜  
塞克德等言應遷移其餘竝未言遷移則吳  
三桂必致反叛也議事之人至今尚多試問  
當日曾有言吳三桂必反者否及吳三桂倡  
叛四方擾亂多有退而非毀謂因遷移所致



若彼時朕諉過於人將會議言應撤者盡行  
誅戮則彼等含冤泉壤矣朕素不肯諉過臣  
下卽部院事有錯誤朕亦自任朕自少時以  
三藩勢焰日熾不可不撤豈因吳三桂反叛  
遂諉過於人耶今亂賊雖已削平而瘡痍尚  
未全復君臣之間宜益加修省息兵養民布  
宣德化務以廉潔爲本用致太平若遂侈然  
以爲功德崇上尊稱濫邀恩賞實可恥也和

碩裕親王福全等再三陳請



上復諭曰頃九卿等以逆首旣除四方底定奏請上朕尊號朕自御極以來日夜孜孜以乂安生民爲念乃逆賊吳三桂一倡變亂遂致塗炭八年當吳三桂初叛時散布僞劄煽惑人心各省兵民相率背叛此皆德澤素未孚洽吏治不能剔釐所致幸賴

上天眷佑

祖宗威靈滿洲兵士之力逆渠授首姦黨悉除地方平靖獨念數年之中水旱頻仍災異疊



見師旅疲於征調被創者未起閭閻敝於轉  
運困苦者未甦且因軍興不給裁減官員俸  
祿及各項錢糧并增加各項銀兩仍未復舊  
每一軫念甚歉於懷若大小臣工人人廉潔  
俾生民得所風俗淳厚教化振興天下共享  
太平之福雖不上尊號令名實多如一切政  
治不能修舉則徒上尊號朕斷不受此虛名  
也朕自幼讀書覽古人君行事始終一轍者  
甚少嘗以爲戒惟恐幾務或曠鮮克有終以



故宵衣旰食祁寒盛暑不敢少閒偶有違和亦勉出聽斷或中夜有機宜奏報未嘗不披衣而起朕非不知燕息自怡蓋所愛不在一身總爲天下生靈之計政事務求當理官職務在得人期於家給人足百姓樂業而已今吏鮮潔清之效民無康阜之休君臣之間全無功績可紀倘復上朕尊號加爾等官秩則惟有負愧耳何尊崇之有至於

太皇太后



皇太后加上徽號詔赦天下理所宜然其上朕尊號之事斷不可行乃朕實意非粉飾之詞也自今以往大小臣工宜各洗心滌慮砥節勵行休養蒼黎培復元氣爾等可向九卿各官悉諭朕意不必再行陳請

康熙二十一年壬戌二月甲午外藩王貝勒貝子公台吉等請上

尊號

上曰朕自御極以來夙夜孜孜勤求化理期於



中外乂安生民樂業今逆寇雖已蕩平治化  
尚未孚洽前諸王大臣等請上尊號已經有  
旨這外藩王等所請亦不准行

四月丁酉

上諭大學士等曰朕巡幸沿邊地方見設立界  
限處墳墓毀損枯骨暴露者甚多朕心憫焉  
夫掩骼埋胔王政所重可令盛京將軍徧察  
而瘞埋之

五月丁巳



上諭戶部兵部工部從前盛京守奉

陵寢及山海關等處城守章京員缺俱令其子

弟頂補自停止此例悉由京師補授頃朕以

昭告成功展謁

永陵

福陵

昭陵因周視所歷地方見道里遼遠往返艱難  
若章京員缺盡從京師補授則家口遷移重  
爲貧窶者之累且將前任章京房屋田地掣



給新補之員以致前官孤孀無倚不能回京如欲卽留彼處則田廬旣空資生何策困苦日甚深用憫惻嗣後盛京守奉

陵寢及山海關等處城守章京員缺不必自京補授著於伊等子弟內令該將軍選擇賢能者具題引見頂補以免往返遷移之苦倘伊等子弟無人堪用別有補授發往之員可另撥田屋給與其前任章京田屋仍行留給不必掣出令其孤孀得所



六月辛卯

上諭大學士等曰自古聖主每遇水旱災祲未  
有不行虔禱者今亢旱已甚朕欲虔誠齋戒  
親行祈禱爾等查例具奏

八月己卯翰林院奏經筵講章

上曰經筵所以講學修德大典也講章須有勸  
戒箴規之意乃稱啓沃今講章內有道備君  
師功兼覆載二語太過其易之

康熙二十二年癸亥閏六月庚申



上諭刑部人命關係重大凡現審人犯自宜蚤  
取口供速行完結庶不致無辜久禁囹圄淹  
滯斃命其中有應行詳審及等候質對者或  
暫行監候或羈禁各門該管官員亦當嚴加  
稽察不時照管毋令獄卒及守門人等借端  
需索恣行凌辱雖各犯有應得之罪若未死  
於法先死於獄旣非憲典亦干

天和朕心尤爲不忍向來在外各衙門審理人  
犯或係監斃或在路物故凡一起內至三人



以上者定有處分之例今思內外刑獄事屬一體嗣後在內各衙門及各門監禁人犯一起至斃幾人以上者作何處分著九卿詹事科道詳議以聞

十月丁未九卿詹事科道以海寇底定請加上

尊號

上曰加上尊號典禮甚大臺灣屬海外地方無甚關係因從未嚮化肆行擾掠濱海居民迄



無寧日故爾興師進剿卽臺灣未順亦不足  
爲治道之缺朕觀古來史冊盛世無屢赦之  
事此時雖頒赦加恩小民未必均沾實惠治  
天下之道但求平易宜民而已何用矜張粉  
飾且吳三桂剿滅後頒赦未久今又以昇平  
行赦殊覺太煩朕但願以平易之道圖久安  
長治不願煩擾多事可將朕意傳諭九卿詹  
事科道知之大學士等隨奏臺灣雖在海外  
乃海賊歷年占踞憑恃其險蒙



皇上指授方畧勦撫兼行海賊遂爾向化神功  
聖德超越千古非加上

尊號無以慰臣民仰戴之願

上曰海賊乃疥癬之疾臺灣僅彈丸之地得之  
無所加不得無所損若稱尊號頒赦詔卽入  
於矜張粉飾矣不必行

康熙二十三年甲子六月庚戌

上巡幸口外侍臣奏曰

聖駕往幸牧馬地方請乘便過烏闌哈達等處



其地水草肥美但柴薪稀少膳房所用  
已經預備其餘官軍令各帶柴薪前往  
上曰凡事豈可獨爲朕一人計要當爲衆人計  
也朕所需用豈致有悞惟恐軍士窮乏不能  
攜帶柴薪以致窘迫設使衆人勞苦朕有何  
樂卽今天下偶有一省水旱朕必遣官支發  
倉庫卽行賑濟雖邊疆海島之遠朕尚惻然  
加念豈有隨從軍士令其枵腹跋涉乎在爾  
等有管軍之責亦應體恤羣下也



十月丙辰

上幸金山乘沙船渡楊子江風浪恬靜舟行甚

速

諭侍臣曰自兵興以來恢復岳州長沙多得舟楫之力今海宇承平昔時戰艦僅供巡幸渡江之用然安當思危治不忘亂朕乘此舟未嘗不念艱難用武之時非以遊觀爲樂也



大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之二



鴻計中味世壽大烈二皇帝聖蹟卷之二  
大壽聖臨合天時數交左亂讐恭劍震赫華燁

連

訓侍臣曰自兵興以來恢復岳州長沙多得將  
輯之力今海宇承平昔時戰艦僅供巡幸設  
江之用然安當思危治不忘亂朕乘此升平  
嘗不念艱難用武之時非以遊觀爲樂也







